



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Anju Bobby George-i 'Woman of the Year Award' angu

Cambodia lenir Hun Sen-i pa melen par jabaso shimmer

VOL. XIX NO. 56 (ADOK 56)

DIMAPUR

ROGONÜ (FRIDAY)

LUCHII (DECEMBER) 03, 2021

₹ 5.00

## Minister Kronu-i Hornbill Pfutsero semzüksü

**Dimapur, Luchii/Dec. 02 (TYO):** Kohima district kübok Kisama nungi alema oa Hornbill benjongmung ajangshitsü mechi Minister, Planning & Coordination, Land Revenue and Parliamentary Affairs, Neiba Kronu-i December 2, 2021 nü Glory Peak nung Pfutsero Experience lapokja liasü.

December 10 tashi agitsü aliba iba benjongmung ya Kalos Society ajanga ayongzüküker aser Department of Tourism ajanga sponsor asür.

Iba sentong nung jembidang, aluyimba aser tourism industry nung rangloker Nagaland ya rongsenketzung tsütsü aintsü jenjang lir, ta Minister Kronu-i ashi.

Alima nung tesem balala semdanga jajaba sülen, item tesemtem ya long amentepa aliba tenemtem, rür, skyscrapers aser awatsüng agi tiburung jungdaksür, saka Nagaland nung arem shirur aser süngdong-lidong tabensa lir, ta pai ashi.

Nüburtemi süngdonglidong peria aliba tesemtem repringner, kechiaser dangalen meta talang iter süngdong kaka angutsü, ta ashi.

Tourist tem tejakleni renloka orr aliba tesemtem repringba agi lakogo saka Pfutsero ama tüzümpung tanep den süngdonglidong peria aliba angutsü jangrar, ta Kronu-i ashi.

Pfutsero Experience ya tetenzüküker ang lir, anungji asenok kanga kumdanga mera agitsüla. Ibai Hornbill mapang kisüng masü saka alema oa akatsüla, ta pai ashi.

Pfutsero sub-division kübok tourist tem atsür arutsüba tesem kar indang lemsatepba mapang, iba tesem nungi Himalayan range, Mount Saramati, Brahmaputra nung ayongtem yimokba, Myanmar nung Chinwin ayongtem jangja-jangja angutsü, Pfutsero Town Baptist Church ya altitude tematiba nung lir, World War II mapang Japan nungeri amshiba longpok, Kikruma yimtsüng nung 1885 küm British nung amena raraba, Glory Peak nung longrang aser ayongtem ajanga Chida awatsüng tashi aoba lenmang, Naga army indang longpok, Rhododendron aser Kami nung ola metanga aoba tesem, Leshemi nung akhi mapang beauty contest jajaba aser Asür A Z Phizo atsükshiba tesemtem lir, ta Minister-i ashi.

Iba tesem ya tourist temi sapuba tesem ka kumdaksütsü asoshi merangba mapang lir, ta pai ashi.

## Dimapur Traffic Police ajanga metetdaksür

**Dimapur, Luchii/Dec. 02 (TYO):** Borlengri Ao Students' Union ajanga Christian Hr. Secondary School ground, Dimapur nung sen agütsür gari anena ayutsü anepalua lir, ta Dimapur Traffic Police ajanga sangdong ka nung ashi.

Iba tesem nung gari ya

Nisung anenzüküdkak ajema aliba indang jembiba mapang, yimtsüng shia 'home stay' lapoktsü ayongzüküker aser ajak dang tourist tem puatsüsa mürekmejutsü ajungshi. Paisa tour guides tem dang Naga nung lipok-lisang aser yimtenren otsü junga meteta alitsü ajungshia liasü.

ADC Pfutsero, Japheth Woch-ia iba sentong nung jembidang state sorkar dang pelaba lemsatepba liasü. Iba tesem semdangertemi balaka ajangshitsü aser otsü balaka asütsü, ta pai ashi.

Pfutsero ya alima tiburung ajangba kisüng masü saka sobaliba balaka amshir aser adventure tourism lenmang lir, Khezhakeno People's festival aser frozen lake amala angutsü, ta pai ashi.

Asenok tashidak wara nungi jenbua mali, anungji ajaki kumdanga benjong amungtsüla, ta ADC ajanga ayongzüküker liasü.

Administration aser civil society temi Eco-friendly festival atema jembir aser Pfutsero Experience nung plastic mamshitsü mera agitsü, ta paisa ashi.

Kohima Science College nung Associate Professor, Dr. Wenyitso Kapfo-i iba benjongmung indang nükjidong lemsatepba mapang, yangi alirtem asoshi alima tepour ajung ya balaka masütsü saka dangalen nungi arurtem atemabo khenyongi balaka asütsü, ta ashi.

Iba benjongmung tasa ya Minister Kronu-i putietba lir aser Pfutsero ya tourism hub ka akumtsü asoshi tetenzüküker alitsü, ta pai ashi.

Iba sentong nung MLA Kezhienyi Khalo aden, kong Kalos Director Kupelhi Losou menden liasü aser Surholu Tunyi-i temeja ken ka aten aser Cheliso Khutso ajanga tarnungeri otsü ka ashi.

Nikongdang Minister Kronu-i 4th People's Festival, Khezhakeno indang Evening carnival moaja liasü.

Khezhakeno Youth Organization ajanga Tourism Department den lungjemer ayongzüküker benjong ya Chida Resort Khezhakeno nung amunger aser December 4 nikongdang tembangtsü.

Iba benjongmung nung akhi tetsü-tebou asaya balala nung tetoktepba alitsü.

Brehostibarnü akhi yimya nung azüki yangluba nung tetoktepba lia Pfutseromi aser Khezhakeno yimtsüngtemi senpet sen lakh ka ngua liasü.

## Hornbill benjung tanabuba anogo takok nung mungogo



**Dimapur, Luchii/December 2 (TYO):** Hornbill Festival tanabuba anogo anepdang sentong nung MLA & Advisor of Tourism, Government of Arunachal Pradesh, Laisam Simai tetushi tesemdang liasü. Alakteta jaoker ama General Manager, North Frontier Railway (NFR), Anshul Gupta Heritage Village, Kisama nung sobaliba sentong nung shilem agia liasü.

Sentong nung o jembiba mapang Laisam Simai-i Arunachal nungertem tenüng nung salem osang lemsatep aser ashiba agi, Northeast state tem renloka aotsü lenmang sadema lapoka lir, kechiyong state shia maitsü khenyongi balaka aser lenla ajak nung maoja lir.

Kasa mapang nung Anshul Gupta-i, Kohima aser tanga district tem infrastructure nung dang masü saka sobaliba aser kenten nung kanga kara renlokogo, ta ashi. Paisa, Railways-i Kohima tonga train bener arutsü atema inyaktepda aser küm ishika tsüngda iba ya ataloktsü imlar, aser iba ajanga linük kübok

tesem balala nungi alima penzürtem iba tesem tonga arutetsü atema teyari agütsütsü, ta ashi. Railways ajanga rongsenketzung nung teyari tulu agütsütsü kong mapa balala den sema lir, ta pai ashiba den Railways-isa, world-class medical aser cultural facility amala agütsütsü, koba state nung aliba nüburtemi achaayangtsü ta ashi.

Dimapur nungi Kohima tashi Railway lenmang nung station 7 mesera 8 alitsü, kong station shia template tem yagi kin balala indang sobaliba aser Heritage sayatsü, ta Gupta-i ashi. Pai state sorkar dang architecture aser design aspect tem ya Nagaland nung aliba kin ka indang mejeta yanglutsü mepshia metetdaksü.

Anepdang sentong indang host ji Minister of Housing and Mechanical Tongpang Ozukum aser Advisor of Information and Technology, Science and Technology, New and Renewable Energy Mmhonlumo Kikon na liasü. Iba sülen Angami Cultural Troupe, Ao Cultural Troupe, Chakhesang

Cultural Troupe, Chang Cultural Troupe, Garo Cultural Troupe, Khamnungan Cultural Troupe, Konyak Cultural Troupe, Lotha Cultural Troupe aser Phom Culture Troupe-i sobaliba tsüngsang, ken aser sobaliba saisapongtem sayaa liasü.

Nikongtsütsü sentong nung Principal Chief Commissioner of Income Tax (CCA), NER, Ministry of Finance Department of Revenue, S H. Shyam Kumar tetushi tesemdang liasü. Sentong nung pai, state indang sobaliba aser libaliro indang aika angazükogo, ta ashiba den India kübok tanga state nung alirtem dang Nagaland semdangtsü ayongzük.

Nikongtsütsü sentong nung host ji Minister for Tribal Affairs and Higher Education, Temjen Imna Along aser Advisor for Food and Civil Supplies, Legal Metrology and Consumer Protection and Taxes, Pukhayi na liasü. Sentong nung Pochury, Kachari, Rengma, Sangtam, Sumi, Yimkhung, Kuki aser Zeliang Cultural troupe-i sobaliba tsüngsang aser ken sayaa liasü.

## COVID-19 Nagaland: Taneptsü angur trok aser tasüba ana liasü

**Kohima, Luchii/Dec. 02 (TYO):** Nagaland nung December 02, 2021 nü nisung tasen asem dak COVID-19 tashidak putet, iba tashidak nungi nisung trok taneptsü angur aser tasüba ana liasü. State nung iba tashidak agi meneper nisung 32,128 jungogo.

Positive cases ana Dimapur district nungi aser Kohima district nungi ka liasü, ta State Nodal Officer for Integrated Disease Surveillance Project, Dr Nyanthung Kikon-i anogoshi sangdongba COVID-19 bulletin nung ashi.

Taoba mapang iba tashidak agi menepa alir nisung trok - Mokokchung nungi pezü aser Dimapur nungi ana taneptsü ngua tang iba tashidak nungi taneptsü ngur alir nisung 30,238 jungogo aser taneptsü anguba rate ya shilem 94.11 alitsü, ta pai ashi.

Tang state nung COVID-19 active cases 128 lir, aser item rongnung nisung 18 dak iba tashidak agi timtem agütsüba sümia lir, nisung pezü tera timtemer, nisung pezü kanga mejungi kangshir aser nisung 107 dak iba tashidak agi timtem agütsüba mali, ta pai ashi.

Kasa mapang COVID-19 ajanga asüba ana liasü aser tang state nung iba tashidak keter asür nisung 696 alitsü aser item rongnung nisung 16 dak danga tashidak keta liasü, ta Dr Kikon-i ashi.

Ajak senteper COVID-19 agi menepa alir nisung 1,064 danga state temi ogo, ta pai ashi.

Tang tashinung Nagaland nung COVID-19 tashidak alitsü temolung melemtemi sample 4,11,350 tendangogo. Item ya RT-PCR nung 111,583 tendang,

TrueNat nung 88,600 aser Rapid Antigen Test nung 2,11,214 tendangogo, ta paisa ashi.

Bodhbarnü tashinung state nung nisung 740,888 nem COVID-19 vaccine doses 12,91,170 agütsügo, ta State Immunization Officer, Dr Ritu Thurr-i ashi.

State nung iba mozü agir alirtem ya frontline nung inyaker 60,979, healthcare nung inyaker 15,999, arishi küm 45 nungi tema nisung 209,650 aser arishi küm 18 nungi 44 tsüngta nisung 454,260 alitsü, ta pai ashi.

Nisung 550,282 nem vaccine dose tanabuba agüja parnok iba vaccine course ajunga temogo. Parnokji frontline nung inyaker nisung 48,528, healthcare nung inyaker 13,512, arishi küm 45 nungi tema nisung 173,423 aser arishi küm 18 nungi 44 tsüngta nisung 314,819 alitsü, ta Dr Thurr-isa ashi.

## AR amakba nung bendanger shilem mali: MHA

**Guwahati, December 01, 2021 (Agencies):** Manipur nung November 13 nü Assam Rifle convoy amakba nung bendangeri shilem agiba kecha mali ta Ministry of Home Affairs (MHA)-i ashi.

"Bendangeri shilem agiba kuli kecha mali" ta Lok Sabha nung MHA-i ashi.

November 13 nü

Churachandpur district kübok Sehkan yim anasa 46 Assam Rifles commanding officer colonel Viplav Tripathi (41), pa kinungtsü Anuja Tripathi (36) aser tena jabaso Abeer Tripathi (6) nunger tepset.

Iba tatalokba ya National Investigation Agency (NIA) ajanga bushisüngdang südar ta MHA-isa metetdaksü.

Iba ya Manipur nung amenoka

aliba telungpur teloktem- People's Liberation Army (PLA) aser Manipur Naga People's Front (MNPF) ajanga inyakba liasü.

Telungpurtemi IEDs amshia Assam Rifles sepaitem amak.

Iba lendong nunga Rifleman Suman Swargiary, Rifleman Khatnel Konyak, Rifleman RP Meena aser Rifleman Shyamal Das nunger tepset.

## NEMIS aser E-Classroom Program tenzüksüogo

**Dimapur, Luchii/December 2 (TYO):** Advisor School Education K.T. Sukhalu IAS (Retd.)-i, December 2 nü Department of School Education-i yangluba Education Management & Information System (NEMIS) aser ICT & Digital Initiatives kübok Samagra Shiksha, Nagaland-i benoka inyakba E-Classroom Program tenzüksüogo. Iba sentong ana ya Directorate of School Education, NECTOR Conference Hall nungi tenzüksüo liasiü.

K.T. Sukhalu-i, NEMIS yangluba atema Department of School Education nem tenünsang agütsü aser ashiba agi, iba ajanga state kübok aliba tanurtem aser talisa yimdak yimtsüngtem nung aliba tanurtem nem kakat shiasatsü jenjang tajungtiba agütsütettsü. Paisa, tanurtem jenjang meteta alitsü atema inyakyim ka benoktetba atema kanga pelaba lemsatet.

Maneni K.T. Sukhalu-i, tetsükdaktsü balala aliba ajanga kakatshirtem aser talisa sorkar school tem nung azüngertem wara pokteter aliba mapang online ajanga class nung junga mangazükteti aruogo ta shia Online Education dak sendakba nung tetsükdaktsü balala adokbatem bentettsü atema E Classroom Programme benokba atema India sorkar Ministry of

Education dang kanga pelaba lemsatet, kechiyong iba ajanga kakatshir, tesayur aser Department nem teyari tulu agütsütsü, ta ashi.

Pai, tesayur aser ketdangsürtem dang iba facility takok tashi tajangzük keta amshitsü ajungshi, ajita asünungdang sorkar school tem nung azüngba kakatshirtem latest technical developments teyari agia parnok sasa update sütettsü.

Iba sentong ya Shanavas C. IAS, Principal Director, School Education lenisüba nung agi aser pai NEMIS aser E Classroom Programme indang tatsü agi rasaa ashi. Iba sentong nung Special Secretary, School Education Kevileno Angami; Mission Director, Samagra Shiksha Tamsunaro Aier; NBSE Chairman, Asano Sekhose aser department nungi tanga ketdangsürtem dena liasiü.

Nagaland Education Management & Information System (NEMIS): The NEMIS Portal ya DoSE-i, state nung sorkar aser nija school tem inyakyim asadanga alitsü atema yangluogo. NEMIS nung item ya angütsü:

1. School Ownership & Management osang
2. Teaching aser Non-Teaching Staff osang
3. Online Admission Register

4. Class wise Students Information

5. Results

6. Health Record

7. Transfer Certificate

8. Child Tracking

NEMIS ya department nungdak apir tarutsü nung features tali bendenloksü atema modify sütettsüsa yanglua lir.

E-classroom indang concept ya wara maru tsüngda state nung benoker liasiü. 2020-21 küm Ministry of Education and Literacy, Govt. of India-i, state nung Elementary School (Classes 6 nungi 8) aser Secondary Schools 282 (Classes 9 nungi 12) nung E-classroom amshitsü temelaba agütsür liasiü. E-classroom agütsüba nükjidong rongnung kaji kakatshirtem state mokdanga ayuba ajanga tangazükba nung tetsükdaktsü adokba bentettsü atema lir.

Class balala indang lesson tem indang e-contents ya SCERT/NBSE curriculum nung ajemdaker yanglua lir. Pre-loaded video lessons tem pen drive tem nung inokja lir aser item ya SMART TV tem ajanga sayur. E-content modules nung 2D, 3D animations, videos aser illustration tem keta lir. Lesson tem ya curriculum melenshia aoba apir yanglushitettsü. SamagraShiksha, Nagaland-i e-content develop asütsü atema Bright Tutee den longjemogo.

## Mokokchung nung pension benefit agizüktsü maongka agütsür

**Dimapur, Luchii/December 2 (TYO):** District Welfare Officer, Mokokchung sangdong ka ajanga state scheme kübok National Scheme (NSAP) aser Disability & Blind pension kübok Old Age Pension, Widow Pension, disability pension benefit magizüki aliba pensioner/Beneficiaries tem nem December 8 nungi 18 tashi pension benefit agizüktsü atema mapang lapoktsüba sangdongogo.

Pension benefit ya item anogotem nung office mapang

District Welfare Office, Mokokchung nungi agizüktsü. Atakzükja aliba mapang tembangba sülen pension benefit magütsütsü, ta kasa sangdong ajanga metetdaktsü.

Beneficiary tem shirnok tsüngtong maruteter, parnoki VCC/Pastor nungi agizükba life certificate sayutsü nungdaker. Maneni Disability Pension agizüktsüpartem dang Disability Certificate photo copy ka, passport photo ka aser Aadhaar mesera Residential Proof bener arutsü metetdaktsüogo.

## Dimapur nung mejangjaba tasü mang ka nguteta lir

**Dimapur, Luchii/December 2 (TYO):** December 1 nü aonung 8 ako shi nung arishi küm 40 nungi 45 tsüngda asütsü ta bilemba non-local tebur ka tasü mang Dimapur railway track (line-04 of Dimapur yard at km 259/09-260/0) nung GRPS duty party-i ngutetogo.

Asüsang ya sentsü temesüng aser olive green T-shirt ka semer liasiü. Temzüng ozüing kübok inyakyim ajak

tembanga inyakba sülen tasü mang ya PM examination/identification atema District Hospital Dimapur Morgue-i benerogo.

Asüsanger kinunger aser medemertem dang Officer-in-Charge GRPS, Dimapur. (Mobile No. 7085055021) den tongteprateptsü atema Dy. Commissioner of Police (Crime) & PRO, Dimapur sangdong ka ajanga metetdaktsüogo.

## NBSE-i HSLC, HSSLC tatidang atema online application osang agütsü

**Dimapur, Luchii/December 2 (TYO):** Nagaland Board of School Education-i sangdong ka ajanga HSLC aser HSSLC tatidang atema online ajanga form apply asütsüba dak sendakba nung osang agütsüogo.

Candidate tem shirnok HSSLC, HSLC aser Compartmental HSLC 2022 tatidang atema kuli balala ajanga Online Application Form apply mesüteti lir, parnok ajak nem December 6 nungi 8 tashi tatembangbuba maongka ka agütsütsü.

Tatidang balala atema tatidang agütsütsü bilema alirtem dang parnok indang form tem Board indang Portal

www.nbsenl.edu.in. ajanga benoktsü tetuyuba agütsüogo.

Item candidate tem yagi late fee sen 500 den tatidang taa dena agütsütsü nungdaker, ta kasa sangdong ajanga metetdaktsü.

Iba dak sendakba nung Institution tekolaktem aser Centre Superintendent ajak dang kakatshirtem nem osang agütsütsü, parnok dang len sayutsü aser atakzükja aliba mapang nung form benoktsü atema verify asütsü mepeshia metetdaktsüogo. Kakatshirtem dang noksa aser signature jangja jangja tangoker yoktsü atema osang agütsütsü, ta NBSE-isa metetdaktsü.

## Kiphire check post nung vaccine certificate asadangtsü

**Dimapur, Luchii/December 2 (TYO):** Covid-19 dak sendakba nung Kiphire District Task Force-i, Longmatra, Yangzitong aser Anatonger nung vaccine certificate asadangtsü atema check post amenoktsü teletmetba agiogo. Iba teletmetba ya December 2 nü DTF senden nung agia liasiü. Iba senden ya DC & Chairman, DTF, T. Wati Aier lenisüba nung DC Office Conference hall nung agia liasiü.

Covid-19 vaccine agütsüba dak sendakba nung state kübok Kiphire district nung nütsüng ishiba nem agüja ali asünung iba teletmetba ya December 6 nü nungi benoka inyaksangshitsü. Züngsemtemisa Vaccine Certificate aser tashidak tendangba result bena malirtem DC Office aser Bank temi midaktsütsü teletmetba agiogo. Maneni senden nung school,

college, shishilembadak mask masemertem aser dokan kibur aser senzusenponger mask mesemi alirtem dang senchi sen 200 achitsü teletmetba agiogo.

Senden nung Deputy Commissioner-i, Administration aser medical team-i Covid-19 dak sendakba nung tangazükba agütsütsü atema yimtsüngtem semdangogo, ajisiuaka Kiphire district nung vaccine ishiba agir lir, ta ashi. Anungji Wati-i, züngsemtem dang tashidak nungi jenboa alitsü atema Covid-19 dak sendakba nung nüburtem ajak nem tangazükba agütsütsü mepeshia metetdaktsüogo. Paisa, wara tasembuba wave atema jenjang tapet agia ajak renema alitsü nungdaker ta ashi. CMO aser DIO-i, inyakyim balala lemsatet aser vaccine agiba sentong takok ngua benokyonga aotsü atema tasatem lemsateta liasiü.



**22nd EDITION**  
*Hornbill*  
**FESTIVAL 2021**

Day 3  
**3rd December**

10:00 am

**GUEST OF HONOUR**

**LT. GEN RAVIN KHOSLA**  
AVSM, SM, VSM  
General Officer Commanding  
4 Corps, Tezpur

1:00 pm

**HOST**

**MR. JACOB ZHIMOMI**  
Minister,  
Public Health Engineering.

**HOST**

**MR. NEIBA KRONU**  
Minister,  
Planning & Coordination, Land Revenue.

**MR. ZHALEO RIO**  
Advisor,  
Sericulture, Excise, Minority Affairs.

**MR. KAZHETO KINIMI**  
Advisor,  
Skill Development, Labour and Employment, CAWD.

10:00 am – 12:00 noon & 01:00 pm – 02:30 pm: CULTURAL SHOW (Kisama Main Arena)

09:30 am – 04:00 pm: CITY TOUR (Kisama to Kohima)

06:00 am: DZUKOU EXPERIENCE (Kisama to Dzukou)

10:00 am – 04:00 pm: PFUTSERO EXPERIENCE (Pfutsero)

10:00 am – 04:00 pm: TOUPHEMA EXPERIENCE (Touphema)

07:00 am – 04:00 pm: HORNBILL WALKS (Phusachadu, Kigwema and Kohima 2nd WW Walk and Kohima)

10:00 am – 05:00 pm: HANDLOOM & HANDICRAFTS (Bamboo Pavilion, Kisama)

10:00 am – 04:00 pm: MYKI FESTIVAL (Kisama)

10:00 am – 05:00 pm: THIRD NAGALAND FILM FESTIVAL Hornbill Edition (Capital Convention Centre.)

KING OF THE HILLS Mokokchung (Vennie Mokokchung)

10:00 am – 05:00 pm: CRAFTSCAPE (Kisama)

10:00 am – 05:00 pm: LIVE DEMONSTRATION OF VARIOUS CULTURAL ITEMS (Kohima Village)

10:00 am – 05:00 pm: 1st HORNBILL CANOE SPRINT/ BOAT RACE (Tsuza Eryu, Doyang)

10:00 am – 05:00 pm: ARTIST CORNER (Kisama)

10:00 am – 05:00 pm: ARCHIVES SECTION & WW 2 MUSEUM (Kisama)

10:00 am – 05:00 pm: HORTISCAPE (Kisama)

10:00 am – 04:00 pm: SALE OF AGRI PRODUCTS (Kisama)

10:00 am – 05:00 pm: ADVENTURE ACTIVITIES (Childrens Park, Kisama)

10:00 am – 05:00 pm: Naga Indigenous Event Touphema (Tuophema)

04:00 pm: HORNBILL 9th HRM RIDERS UNLOCK (Chuna and Kheciegei)

10:00 am – 05:00 pm: KIDS CARNIVAL (Childrens Park, Kisama)

10:00 am – 08:00 pm: ART EXHIBITION – CUM – SALE (World War II Museum, Kisama)

10:30 am – 04:00 pm: HORNBILL INTERNATIONAL PHOTO FEST (Kisama)

08:00 am – 07:00 pm: KHEZHAKENO PEOPLES FESTIVAL (Khezhakeno, Phek)

10:00 am – 04:00 pm: NAGA CHEF SEASON 8 (Kisama)

04:00 pm – 08:00 pm: TRADITIONAL EVENING PARK (Kigwema)

10:00 am – 03:00 pm: Nagaland LITERATURE FEST (RCEMPA, Jotsoma)

09:00 am – 09:00 pm: HORNBILL FUTSAL (Kakit & Sovima)

12:00 noon – 09:00 pm: Hornbill Bamboo Carnival (Nagaland Bamboo Resource Centre Sovima, Dimapur)

06:00 pm: Music Festival :TUNE UP CHANNEL/ RUN MONDAY RUN (Main Arena Kisama)

06:00 pm – 09:00 pm, NIGHT CARNIVAL – 1, NIGHT CARNIVAL – 2, NIGHT CARNIVAL – 3, NIGHT CARNIVAL – 4 (Kohima Town, BOC Junction, High School Jn. & Kohima Local Ground, Khuochiezie)

03:00 pm onwards: Pop-up & Concerts by imagi Nation (RCEMPA, Jotsoma)

# Chakma nungertemi PM Modi & RSS tekolakba teyari meshi

**Itanagar, Luchii/December 2 (Agencies):** Chakma Development Foundation of India (CDFI)-i Brehostibarnü Ato Kilonser Narendra Modi aser RSS tekolakba Mohan Bhagat dang Arunachal Pradesh nung aliba Chakma aser Hajong nung 65,000, shilu dak ajemdaker senzuka toktüsü merangba nokdangtsü atema jenjang tapet agitsü mepeshia asungdangogo.

Chakma nung lakti tentet yagi "exclusive census" ka agitsü lemetetba ashishio, koba December 11 nungi tenzuka kin ana atema ayongzuka agitsü.

CDFI-i ashiba agi, Chakma aser Hajong nungertem Arunachal Pradesh nungi mintoktsü nukjidong nung ozüing alema census agitsü lir.

November 26 nü Arunachal Pradesh, Changlang district indang deputy commissioner-i pa kubok aliba Chakma aser Hajong nung aliba tesem ajak nung iba kin ana

nütsünyongsük züingdangtsü sangdongogo, koba December 31 nü mesüra iba masü dang sorkar nem osang agütsütsü.

Census agiba mapang bank account details, employment details aser ken o mebenteti alibatem (Bengal Eastern Frontier Regulation kubok Inner Line Permits (ILP) nung aibelenba densema lir) amala jurila osangtem meshir.

"Iba census agiba ya Chakma aser Hajong nung anema mejeta inyakba ka lir. Arunachal Pradesh ya China aser Myanmar den arrtsü nung lir aser iba linük ana nungi linük nüjiso anguba sülen ozüing alema nüburtem maneni arur. Maneni ozüing alema state-i aruba aser Inner Line Permit malibapurtem state nung arua aliba ken o jenti lir aser parnok ya Namsai, Lohit aser Papumpare district nung nisung ajaki ngua litepdar. Ajisüaka state sorkari Chakma aser Hajong nungertem dak dang rangloker inyaker, koba

India temzüng ozüing aser International Convention on the Elimination of Racial Discrimination anema lir," ta Suhas Chakma-i ashi.

"Chakma aser Hajong nungertem ya 1964 nungi 1969 tsüingda Union of India-i anir aru, anungji Bengal Eastern Frontier Regulation of 1873 kubok IPL nungdaka maliasü. Ajisüaka Arunachal Pradesh sorkari state nung IPL makaba Chakma aser Hajong nung masür meyirejang aika anema jenjang agitsü melena Chakma aser Hajong nungeri ILP nung aibelenba bushir, shirnok ILP menungdaker. Iba ajanga state sorkari Chakma aser Hajong nung anema inyakba sayur," ta paisa ashi.

Kasa mapang nung CDFI-i Ato Kilonser Narendra Modi dang Chakma aser Hajong nung dak sendakba nung centre sorkar tinyaktsü benoka inyaksangshitsü mepeshia metetaktsüogo.

# Assam indang civilian award tematiba Ratan Tata nem agütsütsü

**Guwahati, Luchii/December 2 (Agencies):** Assam sorkari state idang civilian award tematiba; 'Asom Bhaibav' ya industrialist Ratan Tata nem agütsütsü telemetba agiogo.

Assam Chief Minister Himanta Biswa Sarma-i Brehostibarnü Twitter ajanga Ratan Tata nem tetushi agütsütsü atema state sorkari telemetba agiba sangdonga liasü.

Axom Divas amungba anogo Chief Minister Sarma-i Brehostibarnü iba osang sangdonga liasü.

Ratan Tata ya Tata Sons

indang mendenbuba lir aser pa ya linük nung kanga dang nungtugu industrialist ka lir.

Assam cabinet-i taoba küm September ita state indang civilian awards tematiba nungja melentsütsü telemetba agi, koba lenla balala nung tangar dang nungi alia tajungba inyakteterem nem agütsür.

Assam Ratna award dang tang nungibo Asom Baibhav ta ajatsü aser Assam Vibhushan dang Asom Saurav aser Assam Bhusan ajatsü. Maneni Assam Shree award dang Asom Gaurav ta ajatsü.

# Sikkim nung ILP inyakyim benokang: SNS

**Gangtok, Luchii/December 2 (Agencies):** Linük security dak sendakba nung ken o aika adokba agintsütsü nukjidong nung Sikkimey Nagarik Samaj (SNS)-i state sorkar dang state nung Inner Line Permit (ILP) inyakyim benoktsü atema bangzüng ka yanglutsü khangogo.

Party-i, state sorkar dang iba ken o ya December 5 nü nungi tenzuka agitsü aliba taruba Assembly session nung benoktsü aser ken o maneni asadangtsü atema Union sorkar dangi abentsü mepeshia

metetdaksüogo.

Bodhbarnü osangbenertem den sensaksemba mapang SNS tir Bharat Basnett-i, arrtsü nung mangatettep adoker aliba tesemtem nungi nüburtem senoka aitba ajanga linük security dak sendakba nung tetsükdaktsü adoktsü, ta ashi.

Paisa, Union Home Minister Amit Shah-i Citizenship Amendment Bill atema sensaksemba mapang iba onük benoka jembiogo aser mapa kuma inyakyonga aotsü tenangzükba agütsüogo, ta ashi.

Kasa mapang nung party-

isa, tang state nung Public-Private Partnership (PPP) nung maparen balala benoka inyaksangshia alibatem anendaktsütsü ayongzükogo.

Tawa SNS-i Gangtok nung mega construction project anema Urban Affairs ministry nem tashishiba ka agütsüogo.

Tashishiba dak ajemdaker ministry-i Urban Development department aser Gangtok Smart City Ltd dang takaratiba nung jenjang tapet agitsü aser iba osang takaratiba nung benoktsü tetuyuba agütsüogo, ta SNS tiri ashi.

# Manipur: ZUF camp ka maktok



**Imphal, Luchii/December 2 (Agencies):** Assam Rifles Police na longjemer meita aoba mapang Manipur kubok Kangpokpi district nung telungpur tesepe ka ngutetogo.

Meita aoba mapang sepaitemisa prangbong injang aser hadir balala nguteta liasü, ta ketdangsüri ashi.

Zeliangrong United Front (J) group telungpurtem munga aliba

osang tejangja ka angazükba sülen iba team yagi sepai team ka aser Manipur Mongolbarnü Kangpokpi district kubok Nungjang yimtsüing nung bushisüingdanga meita oaba sentong ya ayongzuka agi.

Sepaitemi meita aoba lazüka security force tem Kangpokpi matong tsüingda telungpurtem ajak jena orr liasü, ta ketdangsürtemi ashi.

Sepaitemi maneni iba tesem meita atadar.

**THIRD NAGALAND FILM FESTIVAL**  
HORNBILL EDITION

03-05 DEC 2021 10:00 AM-05:00 PM CAPITAL CONVENTION CENTRE, KOHIMA

**FREE ENTRY**

DRY 02  
**4TH DEC 2021**

<b>10:00 AM - 10:50 AM</b>	<b>Senmang</b> (Fiction/Nagaland) 40m Director : Bendang Walling Followed by Q&A
<b>10:50 AM - 12:25 PM</b>	<b>Up Down and Sideways</b> (Documentary/Tamil Nadu/Nagaland) 1h.23m Director : Anushka Meenakshi & Iswar Srikumar Followed by Q & A
<b>12:25 PM - 01:00 PM</b>	<b>Oh My Soul</b> (Documentary/Nagaland) 26m Director : Kivini Shohe Followed by Q & A
<b>01:00 PM - 02:00 PM</b>	Lunch Break
<b>02:00 PM - 03:00 PM</b>	<b>Masterclass</b> "Cinema Appreciation" - Meenakshi Shedde <b>Workshop</b> "Digital Photography" - Hiroo Keswani
<b>03:00 PM - 04:05 PM</b>	<b>Janani's Juliet</b> (Documentary/Pondicherry/Maharashtra) 53m Director : Pankaj Rishi Kumar Followed by Q&A
<b>04:05 PM - 05:50 PM</b>	<b>Crossing Bridges</b> (Fiction/Arunachal Pradesh) 1h.44m Director : Sange Dorjee Thongdok

DRY 01  
**3RD DEC 2021**

<b>10:00 AM - 11:00 AM</b>	Inaugural
<b>11:00 AM - 11:25 AM</b>	<b>Angh</b> (Fiction/Nagaland) 23m Director : Theja Rio
<b>11:25 AM - 01:00 PM</b>	<b>An Engineered Dream</b> (Documentary/Kota) 1h.12m Director : Hemant Gaba Followed by Q&A
<b>01:00 PM - 02:00 PM</b>	Lunch Break
<b>02:00 PM - 03:00 PM</b>	<b>Masterclass</b> "Film Tourism" - Vikramjit Roy <b>Workshop</b> "Scriptwriting" - Munish Bhardwaj
<b>03:00 PM - 04:40 PM</b>	<b>Bethlehem</b> (Fiction/Israel) 1h.40m Director : Yuval Adler
<b>04:40 PM - 05:20 PM</b>	<b>Look at the Sky</b> (Fiction/Manipur) 30m Director : Ashok Veilou Followed by Q&A

DRY 03  
**5TH DEC 2021**

<b>10:00 AM - 10:26 AM</b>	<b>Longra</b> (Documentary/Longra) 26m Director : Sankhajit Biswas
<b>10:26 AM - 12:00 PM</b>	<b>Iewduh</b> (Fiction/Meghalaya) 1h.35m Director : Pradip Kurba
<b>12:00 PM - 01:00 PM</b>	<b>Masterclass</b> "Independent filmmaking" - Haobam Paban Kumar
<b>01:00 PM - 02:00 PM</b>	Lunch Break
<b>02:00 PM - 03:45 PM</b>	<b>Semkhor</b> (Fiction/Assam) 1h.32m Director : Aimee Baruah Followed by Q&A
<b>03:45 PM</b>	Valedictory



## TIR YIMYIM YIMOBILEM (EDITORIAL)

DIMAPUR ROGONÜ, LUCIII (DECEMBER) 03, 2021

### Joko Khristmas arur

**K**üm tatem December itai ayaokba ya , joko, asenok asoshibo Khristmas benjong among tenzüker amai akümer. Ibayongji, temulung nung tepelaa pelar aser shisaa bolur. Pelar kechiyong kinunger aser medemertem den külemi benjong amongtsüba mapang arur, saka ano shisabolur kechiyong tapu tapu bilemyonga benjong amongtsü senotsü maka timatemer. Ano, taküm küm ya balaka , yaküm küm nungi Covid-19 wara agi mapa aika meinyaktet takoksa tia ajurur timtema alir kibong aika kümogo. Item kibongtem asoshi tangar kidang benjong sübotsü enoka angubaji temulung shirangtsüka aser Khristmas ken tena angashiba jagia, pelatsü melen, temulungang tipmadem kümdaktsür. Aji oda, taküm küm yabo, akhidang amato masü, aika kidang Khristmas sübotsü aser Khristmas petinu enoka mangur aser Khristmas ken atemba olaa mangashir. Atangji, meilongibo ishikatibo benjong sübotsüa enoktsü aser Khristmas ken atem tenzüksü, ajisüaka kibong aika nung pelanüaka mepelatetsüsa timtem takoksa aika ataloka lir, anungji takokeribo item kibongtem denji Khristmas tepela aser temeim lemsateptsüba mapang tajungtibaji taküm küm ya asütsü. Ajak atema tia majung kaji, tanü asen lima loktiliba nung ya lia lia takartem kanga takaba akümer aser sensaksertem tali tesensakba akümer. Iba jagi, talisa taküm küm ama timtem takoksa ajuruba küm ama nung ya, ki kar nungbo benjong chiyongtsü chir mechima benden dang, ki aika nung benjong süoshia kata malitet aser benjong chiyong chiyongtsüa mekoki azüngazünga süidaktsütsü. Iba ama lokti nung libaliro memedem, kar onsara aka aser kar kecha maka ta aliba limaji tetsübuttsü lima lir. Iba ama lima nungji nübertem rongnung rongrong adok manentsü aser ashir auer poktetsü. Ibaji angateta, takartemi sensaker meimtsü aser tulartemi tilartem yaritsü mamatsüla. Atangji, Khristmas mapang ya shi nung pelatepa amongtsüba anogo masü saka tanüla nung Tsüngrem nem tenüngsang agüja amongtsüba mapang lir. Ajisüaka, ano külen asenoki angatetsüba kaji, Khristmas mapang ya shi nung lumia amongtsüba mapang masü mesüra süoshi mashi ka sübor mapa inyaka amongtsüba anogoa masü. Khristmas mapang yabo shi aser tanüla na prongla nung pelatepa, tsüngsanga, kentena, chiyongtepa pelatepa amongtsüba anogo lir. Anungji, nisung shiai nisung shia peladaktsütsü merangtsüba mapangji Khristmas mapang ya lir. Nisung jashitsü aser pelatsüba ya tuluka magütsüba mesüra agütsüba agi masü saka tilaka nung pelar aser tilaka nung jashir. Aji oda, takoktsü dang süra asenia taküm Khristmas nung nisung kwi mesüra kibong kwibo peladaktsütsütsü (?) ta bilema nisung tenüng kar züludenang. Asenoki aiben Khristmas mapang ya sempet agütsütepba mapang amato bilema benschir. Tetezü aseni agütsüba amato par-ia agütsütsüla aser ano pari agütsürji asenia agütsütsüla ta asenoki bilema benschir. Atangji, ajia sobaliba tajung, anungji yamaji awashi meteta inyaksüla. Ajisüaka, Khristmas temeim yabo tangar dang nungi langka tajung imlaa meimba temeim masü saka angati meimba temeim lir. Aji oda, asen nem langka agütsür nem ano asenia langka meyipa agütsüba nungjibo, shitakba agibo, kecha temeim mali, ajibo awashi metetba sobaliba ka dang lir. Ajisüaka, asen meyipa angutsü kecha mebilemi asenoki nungdakba purtem asoshi langka tajung angati inyaktetra, ajiang shitakba Khristmas temeimji asütsü. Iba tangatetba nung taküm küm yabo asen meketa alirtem, shirnok Khristmas nungdak meperitet timtema lir, itemji repranga, parnok nungi langka meyipa angutsü imlaa masü saka shitakba temeim agi teyari tilaka dang agütsütetra , taoba mapang monga aruba Khristmas ajak dang tajungba aser temoatsübaaji taküm Khristmas ya asütsü. Asen nem sempet ka agütsüba agi mesüra mapa tajung ka inyaksüba agi, asenoki tangar nem langka tajung ka agütsübaaji temeim masü saka pelaba sayuba tamaittsü lir. Ajibo, Khristmas tamaittsü masü sobaliba asütsü. Aji oda, temeimtsüka asüba agi meimbaji temeim masü saka tesempatsüka süaka meimbaji temeim, ibaji shi shi Khristmas temeim lir.

## OLEMSABANG

### Santa Clause Onsara Saklok: Ibai Nungdak asü Talila Ka dang?

- N. Imtitoshi Longkumer, Youth Director,  
Ungma Baptist Arogo

Ajaki küm tenzükli nungi kanga dang yongyaseta ataba Benjong ana lir aser aji Pei tasoba anogo aser Yisu Khrista asoba bilemtetba mong anogo. Tulu-tila, takar-sensaker ajaki kanga dang yongya-a item anogotem asoshi arishi aser taküm tajung nung tokjang ta sarasadema adar. Adangji Khristmas ya jangratemtsüka lir, asenok temenen nung samar lia Tsüngremi Pa ajaso Chir ka aliba asen menen alangzüksü asoshi taküm tenla agütsü. Anungji asenoki mepela-i lidi ma? Kodaser jokdena/pongdena yongyaseta matatsü? Yisuji asenoki tanela nung aser mulungsentsü ajak agi agizüksü sarasadema alitsüla.

Khristmas asoshi küm tetenzük nungi kija taküm, kibong, Yangyu-zunga aser telok ajaki Yisu asoba mapa nung chi auso ka kinunger aser medemertem den lemsateptsü nükdijong nung küm piyong hajira oa sen terabo rizünga adar. Nashi mesüra Ak tajungtiba ka alia tepseter pelateper. Aji dang masü saka kodang Khristmas dongtir asen kilong aser kima, Yimdongtem lashishiba/perangshiba (lights) alir sobotsür. Aka maka ta masü saka hesap-kitap ser langkabosa asenoki inoktsü meranger aser adangji khristmas mapang kima yimdong nung jajatsü jangratemtsü. Alima ajunga tesangwa aser tebur junga yangpanger. Ayaterem tonga tila tanurtem kima yimdong nung ayazüba, tantsür tamburtem menürem jakden dener angur, aser Benjong ken Talisa BoneyM aser SAMARO teloki adenba ken kinuük pezüsü nungi angashidang asenok pelar. Item ajak ya kechiba? Iba ya tanga masü saka asen Kümtetdakba Yisu khrista aruba tamaittsü aser Pa arutsü yongya ataba terenemshiba tem lir. Ajak ya kanga dang tongtipang aser itemi inyakba ajanga asenoki Yisu aruba tali meraketdaktsür.

Saka renemshiba ajak rongnung Santa Clause renemtsüba ya adamata ka masü. Yisu asoba masü saka Santa-ba asoba benjongmong ama asenok Naga nungeri kümdaktsüogo. Temesung nungeri ashiba shin O ka nung yamai ashir, "tera metet ser ashi ama sayubaji timtim/lendong tulu". Süra asenoki Santa Clause ya komaka metet? Kanga junga metet asü tera meteter Santa Clause jilu benschidang Naga lima/Ao lima ajunga santa clause agi süngdaktsür? Ya tebilemdangtsü ka lir. Süra Santa Clause ya shiba? Santa Clause ya anu-aolen (West) Bishop ka liasü. Khristmas mapang nung pai sensaker, lajar, kodamasür tem aser talisa tila tanurtem nem sempet sa agüja jaja. Pai pa ji shibar aji memetetdaktsünüba agi soushi temerem asem aser tejak nembanger jaja. Aser pai inyakba mapa ji ajaki kanga dang pelasete aser junger ta reprang. Santa Clause-i mapa tajung inyakbaji alimai kodanga mamatetsü. Anungji tanü tashi kodang Khristmas arudir Santa-i inyakba mapa tajungtem bilemteter.

Saka tanü asen lima nung ajidangra tepangkatsüka aser kanga dang süngmanga bilemer. Kechiba? Anüolen tambur kati mapa tajung inyakbaji masü saka pai koma sobutsü asem aji asenoki aji dang kanga junga ajizük. Santa Clause-i bo sobotsüji masü saka Yisu asoba mapang mapa tajung jenti inyak saka asenoki bo pa mapaji masü saka pai sobuba ji dang angatet aser benschia arur. Tesasatsüka! Khristmas mapang jila aser yimtsüngtem semdanga odangang, asen tepang nung manga (flies) dena aitsüsa Santa Clause renemtsür. Küm ishika ogo ni Dimapur nungi atudang yimtsüng ka nungbo Santa Clause anung tom nung tank nung mener yimzua angu, ano tatsüka atu nung kasa Santabaji süngdong madak amerlongtsü (motorcycle) ka nung mener liasü, ni süngmangseta atua ali nung ano ni amenba gari-ji santa Clause temera nung süia ao (highway ajak amokbanga Santa Clause temera kakshir iba telung nungji garitem jaja), aaahhreeee ya kechi ta bilema ali nung dena tesem ka nungbo Santa Clause kanga tuluka ali nung merepdaker lemjus (lime juice) bottle ka amer jesma (sun glass) nakja ka kakloker angu!!! Kanga dang menünua saka temulung shiranga liasü aser item noksatemji mapang shia kü mulungi tanü tashi arur. Sen, mapang aser nübu jenti indoka Santaba ya renemtsür. Shibai/shirnoki/shir yimtsüngi/Arogoi/Ianur teloki Santa Clause ya tajungba renemtsür ta tokteper ama yuteper. Koda tamashi!

Santa Clause ayubaji junger mesüra majung ta ni kecha meshili saka ku tangatetbaji Santa Clause tuluba aser tajungtiba ayutsü melenbo Santai inyakba mapa tajung ka danga asü nunga asenoki iba Khristmas mapang inyak nung koda? Santa Clause-i mapa tajung inyakbaji masü saka asenoki pai sobuba ji dang ajizük, anungji takümbo pai sobubaji masü saka pai inyakbaji kar benschia nung koma süla? Khristmas ji teimla aser temeimTsüngremi meimchir nem agütsüba mapang ka lir, anungji iba Khristmas yabo ana anasa aliba kodamasür, leni maor sensaker kar yariti arungma. Santa Clause tuluba yanglutsü melenbo Khristmas nungdem nung tantsür-tambur kar nem aseni akokba yari teyari tila ka asü nunga agütsüti arungma, tsüngküm mapang anungji tzu agi kanga dang anunger, süra tantsür tambur kar nem Santa Clause yanglutsü sen jagi Tzü Pick up load ka danga alitsüra parnok asoshi tepela Khristmasji aji masütsü noh! Asen meket aliba kodamasür nem shi kg ka danga alia agütsüra par atema aji tepela Khristmas mesüli ma? Tila tanur makamait kibong tem asoshi söushi talem kar alia agütsüra aji parnok asoshi tajungtiba Khristmas masütsü noh.

Asen ki ajunga lights agi mesangbanger, Khristmas tree tulutiba mesor, Santa Clause ji nai/ni tajungtiba yanglua, teremshiba kinük ajunga nungi remshidaktsür, saka asen kidanger auyi ajak ponga timtimer, söushi talem maka, shi den Khristmas mapangbo chiyonger saka maka okrongseta alir saka nai/ni aji nguaka soukia mali ta süra iba jagi na Khristan tajung aser tabensa ta jangjati ma? Kima yimdong aser tenla ki tajungtiba ayutsüji kanga tongtipang, saka item dang nungibo taküm Khristmas yabo asen meket aliba nungdakbapur kar yari tajungba mesüli ma? Santa Clause koma renem ta masü, saka Santa Clause-i mapa tajung inyakbaji ajizüka langka tajung inyakra ibaji chichiba Khristmas asütsü.

Tanü tashi benschia aruba yimyatem, alima ajunga renemtsür, Santa Clause tuluba aser tajungtiba ayu saka asen meket nungdakbapur atemabo tenük tapok süra asen taküm tamashi asütsü. Anungji iba Khristmas yabo mapa tajung kabosa inyaka nisung kar asoshibo asen taküm aser kibong ya temoatsüba aser tepela angudak südaktsüdi.

Ajaki Pelatepti. Tsüngremi Moajang.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

# Impur Christian Hospital nung GDA course tembangba sentong agi



Impur (Mokokchung), December 02, 2021: Impur Christian Hospital Impur nung General Duty Assistant course 7 buba telok takok anguba sentong December 2 nü agiba sülen tangokba noksa nung angur.

**Impur (Mokokchung), December 02 (TYO):** December 2, 2021 anogo nung Impur Christian Hospital nung General Duty Assistant course 7buba telok takok anguba sentong ka kanga takok ngua agiogo, ta Principal, School of Nursing Impur Christian Hospital, Mrs. Imtinaro Imsong-i sangdong ka ajanga metetdaksü. Student 32-i iba course kanga takok ngua agiba sülen

certificate agizükogo. Iba sentong nung tongti tejaoker ABAM YM Secretary, Toshi Sanglir-i certificate lema agütsü aser Tsüngrem O jembia liasü. Iba sentong nung jembidang pai, alima nung ajaki tasütsü ta metetakasa, nisung ajaki taneptsü aginüa bushir; anungji iba ama tensa ka nung nenok ya taneptsü agütsürtem lir, ta ashi. "Anungji, nenok yabo shi

aser tanüla nung taneptsü abenba telok süa aika asoshi temelenshi bener arutsüba telok ka asütsüla," ta paisa ayongzük. Mrs. Narola Walling Chaplain, ICH ajanga bendanga agütsü sarasadem agia liasü. Parnoki nübur tenzüksü tejangraba nung apusodang taküm nung azükarua takok ngua inyaker kaka südakjangma ta sarasademtsür, ta kasa sangdong nung shia lir.

# ANOGO ABEN TSÜNGREM DEN

## Mapang tajung ajak alangzükang

"Anungji nenok koda jajar kümdanga reprangang... Mapang tajung ajak alangzükang, kechiyong anogotem tamajung lir." Efesa 5:15-16.

Taküm ya aiben tsüngküm mongpu amai, khen atema dang. Aginüyonga maginüyonga tsüngkümji melentsüsa. Aser kodang tsüngküm tasen kati asenok ayaoka yitir tsübua ratamata koma asütsü ta bilemer. Talisa tsüngküm mapang tatembanglen kati arudang aiben tebilemtsü balala agi atonger, Kü kisung dang kümadok nungbo? Anema alitsü malitsü? Sen agi peritsü asü masü? Taküm tsüngküm ajak nung telemtetba agitsüla. Tetsübu nung mapangji süidaksütsü asü Pauli ashiba ama inyaksü, 'mapang tajung alangzükang, kechiyong anogotem tamajung lir' (Eph. 5:16). Koba tsüngküm ka südir süang, Tsüngrem dak teti tamang akatsüla. Pai ashir, 'Ni na kodanga metoktsütsü', anungji tasü ita asenoki shidi: 'Kibuba kü teyarir, ni metsübuttsü' (Ibri 13:5-6). Tsüngremer tadenba aser tenyari alinungji koba tsüngküm ka südir süang, Yisu den teti jajaa pa ozung nung aser sarasadema tatok agütsütepa mulungsoa kati ka tenzüktepa alitsüla. Tang aliba tsüngküm yaa Tsüngremi moatsüba tajungtiba nung alitsü merangdi.

### Sarasadem

Kibuba, ni tang koba jenjang nung lir, ya na nungi ta agizüktettsü yariang, tetsübu nung anogo mesüidaksüli. Kü nem shisatsü aser tejangraba agüja anogo shia na asoshi shisadanga lidi. Amen

# Vietnam nung Khristantemi missionary Paul Carat nem akhüm agütsü



November 30, 2021 nü Hanoi nung aliba Tuy Hien Tenla kidang Vietnam nunger Khristantemi missionary, asür Paul Carat nem akhüm agütsüba noksa nung angur.

**Luchii/December 02, 2021:** November 30, 2021 nü Hanoi nung Vietnam nunger Khristantemi France nunger missionary, Paul Carat nem akhüm agütsüba sentong ka agiogo; Paul-i Vietnam nung küm aika Arogo aser nüburtem tenzükä liasü. November 24, 2021 nü France kübok L'Herbasse nung Khristan missionary, Paul Carat asü; pa arrshi küm 100 liasü. Pa Vietnam kübok Hanoi aser Kontum Arogo na nung küm 25 (1952-1976) tenzükä liasü. November 30 nü St. Donnat Arogo nung pa den tatembangbuba asüpila sentong agiogo. November 30 nü Vietnam kübok Hanoi nunga Tuy Hein Arogo nung putir, Anthony Nguyen Van Do leniba nung missionary nem akhüm agütsüba sentong ka agi.

Iba Arogo nung züngsem 4,300 dak tema lir, aser parnoki missionary Paul-i küm aika linük nung Khristantem tenzükä aruba atema pelaba lemsatop. Vietnam nung Paul Carat dang Paul Le Xuan Ca ta jaa liasü. Pa ya Paris Foreign Missions Society (MEP) nung züngsem ka liasü. "Ni joko Vietnam nung malir, saka kü melungjangbo iba linük aser iba Arogo den teti lir. Vietnam linük nung rongsenkettsüng jenjang ajungtsü, terenlok alitsü aser tesünep aliba linük ka akümtsü atema ni teti sarasademtsür," ta tamalen pai lemsatopa liasü. Putir, Peter Nguyen Van Khai-i, missionary Paul 1952 küm Hanoi tonga aruba sülen Phu Yen, Phu Gia aser Thuong Thuy Arogotem nung tenzükä liasü, iba dak alia pai Dien Bien, Hoa Binh, Lai Chau aser Son

La province tem nung sepaitem nem pastoral service agüja liasü, ta metetdaksü. 1955 küm Hanoi nung tongti putir, Joseph Mary Trinh Nhu Khue-i communist-i yimsüsüba tesemtem nung aliba Dong Chiem, Nghia Ai aser Tuy Hien Arogotem nung inyaksü atema Paul nem mapa lemezükja liasü. 1972 küm May ita nungbo communist sepaitemi pa densema missionary aika apuba sülen arem nung ayu aser pakümjisa August ita nung ang chiok. 1974 küm nungi 1976 tashi pa Binh Dinh province nung aliba Arogo nung inyaker, aser iba mapang nungji pa Vietnam linük nungi mindok, saka 1987 küm pa Vietnam-i aruba sülen pai tenzükä aruba Arogotem sema senzü. Paul-i Vietnam nung pai ajangshibatem bilemteta kaket pongu zülugo.

# Jalandhar nung nun ka soseta asü; kinüngertemi melung malemer

**New Delhi, December 02 (Agencies):** Franciscan Immaculate Sisters nung züngsem, Sister Mary Mercy November 30, 2021 nü Punjab kübok Jalandhar Arogo indang convent chapel nung lisü agi alenseta sür lia angu.

Lar kinüngertemibo lai lasasa soseta asü, ta mamangteti police dang iba tatalokba bushisüngdangtsü atema takhangba agütsüogo.

Arrshi küm 30, Mary Mercy tasü mangji December 2 nü lar state- Kerala kübok Alappuzha district-i bener ogo. La ya Alappuzha nung aliba St. Andrew Arogo nungi liasü, ta Arogo public relations officer, Xavier Kudiamseery-i metetdaksü.

Mary tebu, John Ouseph-i Alappuzha district collector dang la asüba kuli bushisüngdangtsü atema takhangba agütsüogo.

Iba tatalokba nung melung malemtsüsa lir, anungji ochi jungkai adoktsü atema Kerala nunga post mortem agütsüla, ta kinüngertemi takhangba agütsü.

Lai soseta asütsüsa kecha kuli mali, ta tebu metetdaksü.

La tasü mang anguba anogo ka jaddang lar kinüngertemi la den phone ajanga jembir liasü.

"La kanga pelaa liasü aser lai Khristmas sempet alitsü lemsatopba den külemi December 2 nü la asoba anogomong amongtsü atema sentong yangluba lemsatopa liasü. La asoba anogomong nung la dangi phone asütsü ta ni nangzükä liasü," ta tebu metetdaksü.



Sister Mary Mercy

La dak temang nung süaka shisatsü nung süaka timtem kecha maliasü, ta paisa metetdaksü.

Sister Maria Indira-ibo la soseta asüba nungji melung malemtsüsa kecha mali, ta shiogo.

Maria-i, Sister Mercy-i shidi ka zülua toktsü, aser shidi nungji lai soseta asüba atema lar kibong aser Arogo dang tatok agüjang ta shia lir, ta metetdaksü.

Alappuzha nung post mortem agiba sülen ang asüpila sentong agia mang aremtsü, ta Alappuzha Arogo nung putir kati metetdaksü.

Jalandhar Arogo nung inyaker putir kati, la kanga pelaa liasü aser la soseta asüba jaddang lai lar kinüngertem den phone ajanga jembia aliba nguogo, ta metetdaksü.

Nun anati tasü mangji Kerala tashi mina ao aser iba tatalokba ken o bushisüngdangba maparen ajak nung tenati yariteptsü, ta paisa metetdaksü.

**OLONG PAITEP # 6015**

1				2				3		4
5		6								
							7			
8										
										9
		10				11				
				12				13		
14										
						15				
16										

- |                               |       |                         |       |
|-------------------------------|-------|-------------------------|-------|
| <b>TIPILEN</b>                |       | <b>LANGTSÜNGLEN</b>     |       |
| 2. Auo nung chiyongtsü asenba | - (7) | 1. Lenmang              | - (7) |
| 5. Mangyimba mapang           | - (5) | 2. Aor kidong ka tenüng | - (6) |
| 7. O tamendakdak              | - (4) | 3. Tenarong maten       | - (6) |
| 8. Pei dak malangba           | - (7) | 4. A _ _ _ g            | - (3) |
| 10. Juli                      | - (7) | 6. Mopung apodoka       | - (3) |
| 12. Sen ayudak                | - (7) | ola adokdaksüba         | - (3) |
| 14. Tenük agi ajitet          | - (4) | 9. Tongtipang tagitsü   | - (7) |
| 15. Tamajung aküm             | - (5) | 10. Menungra bilem      | - (6) |
| 16. Apuso                     | - (7) | 11. Aiür                | - (6) |
|                               |       | 13. S _ _ _ k           | - (3) |
|                               |       | 14. T _ _ _ r           | - (3) |

**OLONG PAITEP # 6014 TELANGZÜBA**

- |                                   |  |   |  |
|-----------------------------------|--|---|--|
| <b>TIPILEN :</b>                  |  | <b>LANGTSÜNGLEN :</b>                   |  |
| 1. Yiar, 3. Tesola, 7. Yimra,     |  | 1. Yimti, 2. Amen, 4. Shiner, 5. Alaka, |  |
| 8. Tangar, 9. Peria, 10. Tanur,   |  | 6. Satan, 9. Putet, 10. Tembar,         |  |
| 11. Tasen, 13. Lemjem, 15. Tambu, |  | 11. Tatok, 12. Amang, 14. Jala.         |  |
| 16. Khuret, 17. Sang.             |  |   |  |



**TANÜBO NAI LANGZÜANG**

Q. Hanukkah ya \_\_\_\_\_ nungeri küm shia amungba benjung ka lir.  
 [A] Jews [B] Christians  
 [C] Muslims [D] Sikhs  
 \_\_\_\_\_ (Taruba adok nung onoki langzüsü)  
**YASHI ADOK TELANGZÜBA :** November 21

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Lika**  
 (n) kimunglumung, wazüka ayuba li ( land, reserved sites)  
 \* Tsüraburtemi tanurtem dang pei **lika** sayutsüla.

**Likalim**  
 (n) yim mesüra kidong meyong li ( community owned land)  
 \* **Likalim** nung kijai mashi mawazür.

**NAI-A YA METETTER MA**

- AMAZON PRIME SABANG NUNG SAYUTSÜ ALIBA MOVIE ASER SERIES KAR: DECEMBER 2021**
- The Tom and Jerry Show: Season 1 (Boomerang)
  - When Calls the Heart: Home for Christmas: Season 7 (Hallmark Movies Now)
  - Joe Bell
  - We Are X
  - Harlem - Amazon Original Series: Season 1
  - FC Bayern - Behind the Legend - Amazon Original Series: Season 1
  - The Ferragnez - Amazon Original Series: Season 1
  - Encounter - Amazon Original Movie
  - LOL: Last One Laughing Mexico - Amazon Original Series: Season 3
  - The Expanse - Amazon Original Series: Season 6
  - A Christmas Star
  - Theory of Everything
  - Boxing Day
  - Christmas Is Cancelled
  - With Love - Amazon Original Series: Season 1
  - Joy for Christmas
  - Who You Think I Am
  - Being the Ricardos - Amazon Original Movie
  - Yearly Departed - Amazon Original Special
  - Lady of the Manor
  - Time Is Up

**SUDOKU # 6056 TELANGZUBA # 6055**

			4	8	6	2		9	1	4	9	6	5	7	2	8	3
9		6				3			2	5	6	3	8	4	7	9	1
		8		3	5	7	6		3	7	8	2	1	9	6	5	4
2	3		6	9		4			4	6	1	9	2	5	8	3	7
7	8				3				5	3	7	4	6	8	9	1	2
			5	4	7	8	2	3	8	9	2	7	3	1	5	4	6
5	3						7	8	7	8	4	1	9	2	3	6	5
1		2	8		4			5	9	2	3	5	4	6	1	7	8
		9	3	5			4		6	1	5	8	7	3	4	2	9

**OJANG LUTEP # 5602**

- NTSEI :
- AKTÜM :
- JIKA :
- IMAALR :
- GSERONN :
- NDAG :
- UNNGI :
- ANKGA :
- IAG :
- AOTBA :

**OJANG LUTEP TELANGZÜBA # 5601**

**MAKA MAIT DANGBO ALIMA NUNG YA SHINGA MALITSÜ AMAISA BILEMER**

**TAN HOPTA ATEMA - KOMA SÜLA ?**

Q. Kohima nung Hornbill benjong amongtsü atema Kisama yim akümba ama, Mokochung district nunga yim ajunga adenshia sobaliba benjong amongdak yim tasen ka mesemtet nunga koma süla ?

# Rajya Sabha MP 12 anentsüba anema opposition-i longkak ait



New Delhi, December 02, 2021: Asükwa mongpu Parliament mapang Rajya Sabha MP 12 anentsüba anema Brihostibarnü Parliament kima Congress MP Rahul Gandhi densema opposition lenirtemi longkak aitba noksa nung angur.

**New Delhi, December 02 (Agencies):** Asükwa mongpu Parliament nung Rajya Sabha MP 12 anentsüba anema Brihostibarnü Parliament kima Mahatma Gandhi kürakyanglu anasa opposition party balala nungi MP temi longkak aitogo. Congress Party lenir, Rahul

Gandhi densema opposition MP temi Rajya Sabha nung anentsüba MP tem den külemi mener longkak aita sorkar dang MP tem anentsüba agienang, ta takhangba agütsü. Taoba tsüngluruwa mongpu Parliament mapang senden nung tim mestii benshiba atema Raja

Sabha MP 12 anenja liasü. Opposition MP temi ashiba agi, senden nung temzüng anema MP tem jagi meinyak, saka anentsü. Raja Sabha nungi anenja aliba MP temi tesüiba anogo aika Mahatma Gandhi kürakyanglu anasa mener longkak aita arudar.

# India nunga Karnataka nung nisung ana dak Omicron putetogo

**Bengaluru, December 02 (Agencies):** Tawa linük kar nung Coronavirus Omicron variant putetba sülen linük aikati tenokdangba balala benokba mapang India nunga nisung ana dak iba variant putetogo, ta osang ka ajanga metetdaksü. "Tang tashi nung linük nunga nisung ana dak iba variant putetogo. Anapronglaji Karnataka nungi lir," ta Union Health Ministry nung Joint Secretary, Lav Agarwal-i metetdaksü. Ano külen ICMR DG,

Balram Bhargava-ia, "Ministry of Health indang laboratory 37 nungi INSACOG consortium-i genome sequencingasüba ajanga Karnataka nung nisung ana dak Omicron putetogo. Asenok maoksatsüla saka kümdanga alitsüla. Coronavirus dak sendakba tetuyuba balala benshitsu," ta metetdaksü. Karnataka nung Omicron putetba nisung anaji shishilembatsü atema Bengaluru-i aruba South Africa nunger lir. Osang angazükba agi, tena rongnung ka November 11

nü Bengaluru tonga aru aser ka November 20 nü tonga aru. Iba mapang (November 11-20) nungji nisung 95 South Africa nungi aru aser parnok rongnung ana dak Covid positive putet. Anogo asem tejaklen Karnataka Health Minister, K Sudhakar-i nisung anaprong dak putetba coronavirus variant ji balala ta metetdakja liasü saka Brihostibarnü Union Health Secretary-ibo, tenaprong dak Omicron variant putet, ta metetdaksür.

# PM Modi-i senden ka ayongzüka cyclone tensa asadang

**New Delhi, December 02 (Agencies):** Tang India linük nung cyclone dak sendakba tensa nung ajemdaker Brihostibarnü Ato kilonser, Narendra Modi senden ka ayongzüka amen, ta ketdangsertem osang ka ajanga metetdaksü. Senden nungji tongti ketdangsertemi, Bay of Bengal nung cyclone ka

tentetdar aser ibaji ajanga Andhra Pradesh aser Odisha tzüyimkülen kongshitsu akok, ta Ato kilonser nem metetdakja liasü. Indian Meteorological Department (IMD)-i, December 4 iba yipru tesashiji Odisha tzüyimkümlen atongtsüa akok, ta metetdaksüba nung ajemdaker Odisha state sorkari district 13

nung ketdangsertem dang nüburtem tanga tesemi ainshidaksüsü aser kümzükb maparen inyaksü atema renema liang, ta tuyuogo. South Andaman Sea nung low pressure area nung mopung tesashi tentetdar aser December 4 tashi nungbo cyclone yipru küma tzüyimkümlen kongshitsu, ta IMD-isa metetdaksüogo.



December 02, 2021 nü Jammu nung aliba Raghunath Mandir market nung health worker kati coronavirus tendangtsü atema samples bendenba noksa nung angur.

# 2019 küm National Highways nung gari lendong 1,37,191 atalok

**New Delhi, December 02 (Agencies):** December 2, 2021 nü Parliament nung sorkari, 2019 küm National Highways nung gari lendong 1,37,191 ataloka liasü, ta metetdaksü.

Paisa, National Highways Authority of India (NHAI)-i item ama facilities 39 agütsüogo aser maneni 103 agütsütsü atema maparen inyakdar, ta metetdaksü.

Brihostibarnü Lok Sabha nung telangzüba agütsüdang Minister of Road Transport & Highways, Nitin Gadkari-i, 2018 küm expressways densema National Highways nung gari lendong 1,40,843 ataloka liasü, ta metetdaksü.

Bodhbarnü Rajya Sabha nunga Minister-i, aluyimertemi longkak aitba ajanga Highways Authority-i sen crore 2,731 shi takoksa nguogo, ta metetdakja liasü.

Minister-isa, National Highways kilometer 3,400 bo 6-lane mesüra iba dang nungjagi tajungba küma yanglushiogo, ta metetdaksü.

Paisa, aluyimertemi longkak aitba ajanga yaküm October ita nungi tenzüka gari lenmang nung saru bendenba tsütsü timtem ajangshia aruogo, ta ashi.

Paisa, tang National Highways kilometer 6,250 shi 6-lane mesüra iba dang nungjagi tajungba küma yanglushidar, ta metetdaksü.

Punjab, Haryana aser Rajasthan nungi aluyimertemi longkak aitba ajanga National Highway toll plazas 65 shi nung timtem ajangshia liasü, ta paisa shisem.

Ano tanga tasüngdangba ka langzüdag Gadkari-i, Wayside Amenities (WSAs) dak sendakba nung electric vehicle charging stations ji developers-i agütsür, ta metetdaksü.

Gadkari-i, Financial Year 2021-22 nung National Highways kilometer 12,000 yanglutsü nükjidong lir aser project karbo takümsa tembanga inyaksü, ta metetdaksü.



December 02, 2021 nü Mumbai nung 10buba Vibrant Gujarat Global Summit 2022 tenzükb sentong nung Gujarat Chief Minister, Bhupendra Patel aser Minister of State (Industries) Jagdish Vishwakarma na adenba noksa nung angur.

# Akali Dal lenir Manjinder Singh Sirsa BJP nung denogo

**New Delhi, Luchii/ December 02 (Agencies):** Shiromani Akali Dal lenir, Manjinder Singh Sirsa, Bharatiya Janata Party (BJP) nung denogo; Pa BJP nung adenba sentong nung Union ministers- Dharmendra Pradhan aser Gajendra Singh Shekhawat na dena liasü, ta osang ka ajanga metetdaksü.

küm 70 tashi mebeneti arudar. Linük yimtiba nung Baba Banda Singh Bahadurji tepsetogo... taoba küm 70 tsüngda Sikh nunger atema university ka dang medentet, kechiyong lenirtem (Akali) tashimait. Arrtsü nung raraba lokti tebilemstütem kümsa küm mebenettsüra kechi nungdak ali. Ni lokti atema inyaksü atema BJP nung adener," ta pai ashi.

Manjinder Singh Sirsa ya linük yimtiba, Delhi nung Akali Dal nungi nungtugu lenir ka lir. Pai BJP nung maden tsüngda Delhi Sikh Gurdwara Management Committee (DSGMC) tir mapa tokja liasü.

Pai, aluyimertemi aluyimba ozüng asem anema longkak aitba pusema aruogo, koba Centre-i tawa agintsüogo.

Osangbenertem den jembidang Sirsa-i, "Linük nung Sikh nunger dak sendakba ken o aika lir aser aji sorkari dang bentettsüsü. Ni item ken otem aiben benokogo. Ni tanü home minister Amit Shah den lokti tebilemstü kar lemsatepogo. Minister-i item ken o ajak repringshimtsüsü ta nangzükb pelashishia sangdonger," ta ashi. "Sikh nunger ken o taoba

Punjab nung taruba küm assembly election magi tsüngda Manjinder Singh Sirsa BJP nung denogo. Punjab assembly elections atema incharge Shekhawat-i ashiba agi, pa BJP nung adenba ajanga state election nung party nem teyari tulu agütsütsü.

Pradhan-isa, Sirsa anisemba ajanga BJP tashi taitba akümtsü ta ashiba den pai party nung maden tsüngda DSGMC nung pa mapa toktsüogo, ta ashi.



Madrid, Spain nung nurse kati Wizink Center nung COVID-19 vaccine nūburtem nem agitsüsü renemshiba noksa nung angur. Hombarnü South Africa nungi shilangba arishi küm 61 tain tetsür ka dak omicron coronavirus variant putetogo, ta Spain yimtiba nung aliba health ketdangsürtemi ashi, koba Spain nung omicron cases tanabuba alitsü.

## Cambodia lenir Hun Sen-i pa melen par jabaso shimner

**Phnom Penh, Luchii/Dec. 02 (Agencies):** Cambodia nung mapang talangka ato kilonser inyaka arusang Hun Sen-i pa melena par jabaso tambusang shimner.

Arishi küm 69 tain Hun Sen yagi küm 36 yimsü süa aruba sülen alima nung tenzüker talangtiba rongnung ka kumogo, aser pa yimsüsüba mapang pai opposition, civil society aser osangbener anema nokdaka liasü.

"Ato kilonser ama maneni inyaksü atema ni kü jabaso nungiter ta tanü ni sangdonger," ta Hun Sen-i Brehostibarnü Preah Sihanouk nungi ashi.

Par jabaso arishi küm 44 tain Hun Manet ya Royal Cambodia Armed Forces nung

deputy commander aser joint chief of staff lir, aser pai election nung tokteptsüla, ta ashi, koba 2023 küm alitsü imlar.

Hun Manet ya West Point nung aliba United States Military Academy nungi 1999 küm graduate asü. Pa ya Britain indang Bristol University nungi economics nung doctorate ngua lir.

Preah Sihanouk nungi jembiba mapang political dynasty ka amenoktsü tasa indang bukema Hun Sen-i jembiba.

"Japan nunga (taoba Ato Kilonser Shinzo) Abe ama par dynasty lir. Pa tebou ya ato kilonser liasü aser pai Cambodia semdang. Abe tebu ya foreign minister liasü aser Abe ya ato kilonser liasü," ta

pai ashi.

Hun Sen'er Cambodian People's Party (CPP) yagi 1979 nungi yimsü süa arur aser 2018 küm election agitsü lia sorkar atsüngdoktsü tasa yanglu ta tai tonglokja opposition tongtiba anentsüba sülen züngsem 125 aliba legislature ajunga par telok nungi dang lir.

Cambodia ketdangsürtemi küm ishika tsüngta taoba mapang opposition züngsemtem aser temeden asoshi nokdakertem aika pua aruogo.

Hun Sen-i pa den tokteper aser pa aitsürtem pua merenshiba atema anüolen linüktem aser human rights telok temi mapang talangka nungi aija arur.

## Arütsülen Iran aser Taliban sepaitem khattep

**Tehran, Luchii/Dec. 02 (Agencies):** Afghanistan-Iran arütsü anasa Iran aser Taliban sepaitem tsüngta rongrong adok saka asü-amaba meliasü aser mapang tatsüka lir ibai mangatetep ka ajaga atalok, ta ashi.

Bodhbarnü video kar nung Taliban sepaitem raratsü renemshiba nguogo. Prangbong ola angashi aser video ka nung Taliban-i injang khaloktsüba langzüa Iran sepaitemi injang tulu khalokja liasü.

Hirmand county kübok Shaghalak yimtsüng nung khattep, ta semi-official Iranian news agency Tasnim ajanga ashi.

Tasnim, koba Islamic Revolutionary Guard Corps (IRGC) den tesendaktep lir, parnoki ashiba agi, ozüng alema shibelenba nungi nokdangtsü mechi Afghanistan den arütsü anasa Iran litsü nung jara yanglua lir.

Iran nung aluyimer kar iba jara ya alema ao saka Iran arütsü telung nung lias aser iba mapang Taliban sepaitemi arütsü nung aibelener südi ta bilemer injang khaloktsü, ta osang ajanga ashi.

Khattepba anenogo aser Iran ketdangsürtemi iba tensa indang Taliban den jembishinür, ta ashi.

Arütsü nung alirtem tsüngta mangatetep ka adoka khattep, ta Iran foreign ministry indang odongtar Saeed Khatibzadeh-i Taliban tenüng mamshie Bodhbarnü menur ashi.

Video ka nung Taliban forces tem Iran sepaitem aliba tesem ka telung nung angu aser outpost kar agiogo, ta osangtem ajanga ashi.

Tasnim-ibo Iran sepaitem aliba tesemtem merakzüc ta ashi saka video ya taoba mapang raraba indang lir aser arütsü anükertemi linük arütsü aziüoka lir, ta ashi.

Saka ano IRGC den sendaktepa aliba semi-official Fars news website nungbo Taliban tenüng shia mali aser ozüng alema shibelenertem tai asütsü, ta ashi. Asü-amaba mali aser iba tesem ya süngjema lir, ta parnoki ashi.

Sistan aser Baluchestan governor indang security deputy, Mohammad Marashi-i Iranian state television dang ashiba agi, rara ya tulu masü aser sepaitem mesüra ki-o-jen nung takoksa magütsü aser tembangogo. Rara mesür ya Taliban forces liasü, ta pai ashi.

August ita Afghanistan nungi United States sepaitem ainshiba sülen arüsanga Taliban-i iba linük amokkang saka Iran-i tanü tashi yimjang nung parnok agizüka mali.

Afghanistan nung ajaki shilem agitetsüsa sorkar ka tentetba nung ajemdaker mera agitsü ta Iran ketdangsürtemi ashi saka US dang Taliban nem tenokdangba agüja alibatem agientsü ajungshia liasü.

November ita tom nung Iran indang special representative on Afghanistan, Hassan Kazemi-Qomi lenisüba nung Iran ketdangsürtemi Afghanistan semdanga Taliban lenirtem ajurua jembishinüa liasü.

October ita tatemlen Russia densema kidanger linüktem senden ka Tehran nung Iran-i ayongzüka liasü, saka iba senden nung Taliban mejaok.

## Myanmar sepaitemi longkak aiter asaa tepset: HRW

**New York, Luchii/Dec. 02 (Agencies):** Yangon, Myanmar nung March ita longkak aiter 65 tepsetba ya jelia tasa yanglur inyabka ka lir, ta meimchir temeden mita bushirtemi ngutet.

February 1 nü mitkartemi tashiyim amshia democracy yinya nung shimteta aliba Aung San Suu Kyi'er sorkar atsüngdokba tanaben meyipa agüjang ta nokdaker dak security forces temi asaa lungbanger tashiyim amshi, ta Human Rights Watch (HRW) ajanga Brehostibarnü report ka sangdongba nung shia lir.

"Yangon nung mapa inyaker aliba Hlaing Tharyar tesem nung sepaitem aser police temi mitkar indang assault rifles amer taolen mali longkak aiter aser yirur alir yarir dak injang khalokja longkak aiter aser terepranger tajemba agi 65 tepset," ta New York nung amenoka aliba tentet ajanga ashi.

Tenük kuli alir nisung trok den sendaksemba aser iba azüdokshi indang video 13 aser

noksa 31 social media nung prokshia aliba asadangba nungi iba ya bushiteta liasü.

HRW ajanga video tem asadangba nung police kati TokTok video ka post sütsüba dena lir, kong sepai tanishirtemi longkak aiter dak hadir amshitsüba indang jembiba liasü. Parnok rongnung kati "Item nisungtem dak ni taochi mesayutsü," ta ashiba angashi.

Mitkartemi sorkar atsüngdokba sülen linük tesem ajungalen yimjung nung longkak aita alirtem tashiyim agi aziüoktsü merang. Mitkartemi tentetba sorari longkak aiter ya rongrong agüja ki-o-jen raksatsürtem, ta sangdong.

March 14 anepbongi mener longkak aittsü asoshi longkak aitertem Yangon yimti indang tongtipa lenmang, Hlaing River Road leni ao. Security forces tem anepdang 10:00 ako meta arua longkak aitertem arishi.

Video ana aser satellite nungi noksa tangokbatem asadangba nung security forces temi longkak aitertem ya anüngdang

teroto aser teroto süyia 12:40 ako meta lungbanga liasü, ta ngutet.

Security forces temi tear gas aser ngisa agi meyibanga aliba injang agi akha aser iba sülen injang shidakba khaloktsü, ta longkak aiter Zaw Zaw-i ashi.

"Onoki lijakjang aser long amshi aser kari Molotov cocktail agi aon... Kü nüc agi ngua lia nisung aika asü... Ni iba anogo kodanga mamadoktsü," ta pai ashi.

Security forces temi longkak aiter dak tenük yoker injang khaloktsü südi ta amanger, ta tenük kuli alirtemi ashi.

Security forces temi longkak aiter jena aotsü lenmangtem shibangtsüba aser asaa longkak aiter aser longkak aiter yirur aliba yaritsü meranger health care nung inyaker züka merenshiba ya video nung anguba aser tenük kuli alirtemi ashiba den puteper, ta HRW ajanga ashi.

Yirur alirtem yaritsü merangba mapang nisung pezü yirutsüba tenük agi angu.

Nisung ka tetsüng atoka aser indang-indanga mejajateti liasü aser ka tesülen azü yima lenmang nung liasü, ta HRW ajanga ashi.

Mitkartemi sorkar atsüngdokba sülen longkak aiter aser rongrong repranger nisung 1,300 shi tepsetogo, ta Assistance Association for Political Prisoners (AAPP) ajanga ashir.

Ozüng alema azüdokshiba maneni ataloker, ta HRW nungi Myanmar researcher Manny Maung-i The Associated Press news agency dang ashi.

"Ita tuko süyir atalokba süaka tang tashi tongtipang lir, kechiaser item nisungtem nem tim obendang agütsütsü aser parnoki metetsümonga iba ama inyak ta kuli agütsütetsü," ta lai ashi.

HRW ajanga alima dang tang Myanmar nung meimchir temeden anema inyakba aser mapa tamajung inyakba nung telangzüba agütsütsü ajungshi aser mitkar lenirtem aser mitkartem anema tangatetep

nung tenokdangba agütsütsü ayongzüc.

Ajisüaka security forces züngsemtem asoshi mera agiba kecha angazüka mali aser sorkar ketdangsürtemi telangzüba agüja mali.

"Iba ama mapa inyakba atema tesülen tim mera agia obendangtsü ta parnok nem metetdaksütsü kanga tongtipang lir," ta Maung-i ashi.

Mitkari yimsü asüba anema longkak aiter dak timtem balala agütsüba ajanga civilian meyirijang aika pei ki yutsür tesem balala nung jenoka lir.

Küm aika kilung nung pua ayuba sülen 2015 election nung Aung San Suu Kyi-i aniba National League for Democracy ajanga takok tulu nguteta aser ano 2020 nunga kanga junga takok ngutetba sülen linük nung rongrong adok.

Tesüsa election agiba result ya mitkartemi magizüktet aser February 1 nü tashiyim amshia sorkar atsüngdokba yong linük tesem ajungalen longkak ait tenzüc.

## MULUNGNEN O



Onoki teti meima aliba asür ojala **Tiasola** (Longmisa), mapang tatsüka temang manemi alidang, aser la akümüli wadang tembangba tashi kija kibong, sosem dangsemer, kiyonger, medem sor aser lokti tentet balala shirnokisa tamang sarasadem den nübu aser rongsen agi ozü asüko nungita yariogo, nenok ajak dang kangasa pelaba lemsateper. Onoki kecha meyipa agütsütsü mokok, saka asen Tulusang Tsüngremi nenok ajak talubosa

moajangma ta ozü tamang sarasadem.

**Temeim Kinungbo, Chirnur, Semchir aser Kinungertem**

## MENUNGRA BILEMTETER

"Pa tesünepdaki air, parnok lep nung parnok anisüngzüker, pa temeshi aser tindangba lenmangi aor." ~ **Isaiah 57:2**



**LATE TSUKTINUNGSANG JAMIR**  
06/05/1959 - 03/12/2020

Nai onok toktsür küm ka jungaka, anogoshia na onok mulungjang nung teti alir. Ne mapa tajung aser ajemalu nela menungra bilemteter. Anogotem songtema küm sua oaka na onok mulungjang nung teti altisü aser ne mapa tajungtem kodanga mamatsü. Kenu anogo asenok ajuruteptsü ta teimla nung onok mulung anisüngzüker.

**Temeim Kinungsü, Tsürabur, Adianu aser Kinungertem.**

## Longso Yimkhiung-i HIPFEST-2021 photography contest akok



**Kohima, Luchii/December 02, 2021 (TYO):** Kisama nung tanünububa Hornbill Festival sentong agiba mapang, HIPFEST 2021 photography competition indang osang sangdonga liasü. Brehostibarnü (02.12.2021) Photographer Kekhriezhazo Machieo, Freelance Merimvu Doulo aser Media Officer to the Chief Minister, Ayieno Kechü nungeri HIPFEST 2021 photography tetoktepba tendanga liasü, ta sangdong ajanga metetdaksü.

Iba HIPFEST ya Eastern Art Council den longjemer Department of Information & Public Relations (DIPR) ajanga ayongzüker. Exhibition Gallery nung 'Photo-37c', koba Longso Yimkhiung-i tangoka liasü, pai HIPFEST photography contest kokogo. Kasa tetoktepba nung, Inakavi Kasho aser Parvej Akhtarwere nati tanabuba aser tasembuba jenjang angu. HIPFEST Photography tetoktepba nung takok angur

nem senpet 25,000 agütsütsü. Tanabuba aser tasembuba jenjang nung takok angur nem senpet 20,000 aser 15,000 agütsütsü renema lir. Maneni, consolation prize takok angur tuku sangdongogo aser parnok nem senpet 5000 (5000 each) agütsütsü aser iba den bendenloksema terepranger nungi 'viewer choice' ka shimtsü, koba tenetnububa Hornbill Festival sentong nung sangdongtsü, ta sangdong ajanga metetdaksü.

## Naga Chef Season 8 tenzükogo

**Kohima, Luchii/December 02, 2021 (TYO):** Brehostibarnü, Naga Chef Arena, Naga Heritage Village, Kisama nung kanga dang yongya ataba "Naga Chef Season 8" sorchiok tetoktepba tenzükogo, ta sangdong ajanga metetdaksü. Taküm "Naga Chef" title atema tokteptsü asoshi 'Screening Round' nungi contestant 10 shima liasü. Iba tetoktepba nung takok angutsü asoshi, chef takotet dang masü, saka sorchioktsü sempet tajung alirtemi shilem agidar.

Iba tetoktepba mezüng round atema, shilem agirtemi vegetarian aser non-vegetarian 'NAGA DISH' ka parnok tasa (Culinary Skills) amshia sorchioka sayutsüla. Chef aser entrepreneur tajung ka akümtsü asoshi iba tetoktepba nung round balala agitsü, kong parnok indang sorchiokba tasa jangjatetsü. Shilem agirtem (contestants) ya local cuisine, chiyongtsü sapuba, parnok yimya aser teamwork indang sorchiokba tasa aser sempet nung asadangtsü/tendangtsü.

Nagaland nung Naga Chef ya mezüng culinary skills competition ka asütsü, koba Department of Tourism, Government of Nagaland den longjemer Synergy Group Enterprise ajanga ayongzüker. 'Naga Chef' tetoktepba ajanga Nagaland nung kin balala indang sorchiokba/aon asoba yimyatam ajungkettsütsü aser iba den külemi Naga kin chiyongtsütem alima dang sayutsü asoshi Naga chefs nem sabang ka agütsütsü nükjidong lir, ta kasa sangdong ajanga metetdaksü.

## Noklak nung awareness sentong ka agiogo

**Noklak, Luchii/December 02, 2021 (TYO):** Brehostibarnü, DC's Conference Hall, Noklak nung Nagaland Education Project - The Lighthouse (NECTAR) nung District level awareness aser sensitisation sentong ka agia liasü. Iba sentong nung NEP indang rasa ashiba mapang, Deputy Project Director, NEP - The Lighthouse (NECTAR) Avelu Ruho-i, Nagaland nung Sorkar School tem nung kaketshirtem tangazükba tsütsü temelenshi lidaktsütsü nükjidong nung World Bank nungi teyari agia Department of School Education-i 'Nagaland Education Project'-The Lighthouse - Nagaland Enhancing Class Teaching and Resources (NECTAR)

tenzükja liasü, ta metetdaksü. Nagaland indang Education system nung temelenshi adokdaksütsü asoshi NEP - The Lighthouse ya project ka lir, kong kaketshir aser tesayur temi pei sempet tali jangjatetsü asoshi maangka tulu agütsür, ta Ruho-i shisem. Ruho-i, iba mapatong ajanga State Sorkari mapang tatakzük ka tsüngda timtem asem - State ajunga nung school tem achaayangba yimya karadaksütsü; tesayuba yimya nung temelenshi adokdaksütsü aser tangazükba inyakyim ajungkettsütsü asoshi rangloker inyaksü renema lir, ta metetdaksü. Noklak district nung iba project mapa küma inyaksü asoshi ajaki khuret bena inyaksüla ta lai ajungshia

liasi. Kasa sentong nung, Deputy Commissioner, Noklak, Hiazu Meru-i, Noklak district nung education sector tsütsü tayongzükba jenti lir, koba tekolakpur dang metetdaksütsü nüngdaker, ta ashi. Lenla ajunga nung terenlok asoshi education ya tongtibang shilem ka ta ashiba mapang, Meru-i, District nung Science aser Commerce stream alitsü nüngdaka akümba indang metetdaksü. Kidang kibong nung senotsü agi timtemba ajanga kaketshir aikati item subject study asütsü atema tangaleni motetter, ta pai ashi. Iba sentong nung EAC HQ. Noklak, Kathyinla menden liasü aser Puchai PM-i tepela anküp o jembu, ta kasa sangdong ajanga metetdaksü.



OFFICE OF THE

**AO SENDEN**

"Nabur Asashi" (For the People)

Dt : 2-12-2021

### PELABA METETDAKTSÜR

Kisama nung November 11, 2021 nü kitsük kironng lendong nung Aor ki rongdokba sülen, iba kiji ano tanaben tasen asüba mapang rongsen aser nübo agi yariteperem, item lokti tentet, kija aser kibong ajak dang AO SENDEN-i kanga pelaba metetdaksür :

1. Shri Metsubo Jamir, Hon'ble Minister
2. Shri Tongpang Ozukum, Hon'ble Minister
3. Shri Temjen Inna Along, Hon'ble Minister
4. Shri Imnatiba, Hon'ble MLA & Advisor
5. Chungtia Village Council
6. Longsa Union Kohima
7. SP Mokokchung
8. Commandant 2nd NAP Alichen
9. Dept. of Tourism Govt. of Nagaland
10. Angami Public Organisation
11. Kohima Ao Baptist Arogo
12. Kohima Ao Officers Telongjem
13. Kohima Watsu Telen
14. Kohima Konyak Union
15. Kohima Lotha Union
16. Lotha Legislatures
17. Ao Senso Telongjem Dimapur
18. Southern Angami Youth Organisation
19. Kohima Village Youth
20. Phesama Village Council
21. Kigwema Village Council
22. Phom Union Kohima
23. Kuki Union Kohima
24. Konyak Students Union Kohima
25. Kohima Japukong Senso Telongjem
26. Kohima Chuchuyimpang Union
27. Kohima Unger Senso Telongjem
28. Mopungchuket Senso Telongjem Kohima
29. Longkhum Union Kohima
30. Nagaland Motor Cycle Club, Kohima Chapter
31. Shri Rüsedomg PRO to C M
32. Shri Pele Khezhe, Govt. Contractor
33. Shri Talisenep (Nokpu) NPS Addl. S.P
34. Smti Imtinenla Jt.Secy & Mission Director NRLM
35. Shri Yanger Phom
36. Shri Tinuwati (Japu)

Iba pelaba sangdong nung ya, talisa, KOHIMA AOR TELONGJEM dang pelaba meshiibo tabensa masütsü, kechiyong takoksa lendong atalokli nungi, Ao Senden ketdangpurtem Kohima matongdangyongi, parnokiang anibelem jenti agia ki tasen ka tenzük merenem tashi nüngdak ajak peridakja yaritepogo. Item teyari tulu asoshi KAT dang kanga pelaba, balaka, shisemer.

Asen Tulusang Tsüngremi nenok ajak moajangma.

Sd/-  
**Wb. CHUBAWATI LONGCHAR**  
President

Sd/-  
**Wb. IMTIPOKYIM**  
Gen. Secretary

## Vijay Hazare Trophy 2021-22 atema NCA-i asayartem sangdongogo



**Dimapur, Luchii/December 02, 2021 (TYO):** Aruya aliba Vijay Hazare Trophy 2021-22 cricket asayamung atema, Nagaland Cricket Association (NCA)-i Senior Mens Cricket team sangdongogo, ta Nagaland Cricket Association, Secretary, Hyunilo Anilo Khing-i metetdaksü.

Iba asayamung nung Nagaland team nungi Jonathan Rongsen (Captain), Hokaito Zhimomi (Vice Captain), Sedezhalie Rupreo, Hem Bahadur Chetri, Joshua Ben Ozükum, Imliwati Lemtur,

Nagaho Chishi, Hopongkyu Sangtam, Khrievitso Kense, Tahmeed Rahman, Imomenba Walling, Oren Ngullie, Mungkham Phom, Vijay Rai, Ahon Konyak, Zhaliyetuo Keditsu aser Akamu G Sumi nung asayatsü.

**Professional guest players:** Shrikant Mundhe, Abu Nechim Ahmed aser Chetan Bisht.

### Support Staffs:

Kawaljeet Singh (Team Coach), Nehal Ahmad (Team Manager aser Asst. Coach) Arzoo Raj (Team Fielding

& S&C Coach) Krishna Prabhu (Team Physio)

### \* Match Fixtures:

\* 08-12-2021: NAGALAND V MANIPUR

\* 09-12-2021: NAGALAND V ARUNACHAL PRADESH

\* 11-12-2021: NAGALAND V BIHAR

\* 12-12-2021: NAGALAND V TRIPURA

\* 14-12-2021: NAGALAND V MIZORAM

\* Match ajak Jaipur nung asayatsü.

## Anju Bobby George-i 'Woman of the Year Award' angur



**Monaco, Luchii/December 02, 2021 (Agencies):** India nung athlete tajungtem adokdaksütsü asoshi bendanga agüja inyakba aser lokti nung tetsür aser tebur nem kasa maongka, temeden agütsütsü (gender equality) mapatong nung pusemba atema, World Athletics (WA) ajanga nungtugu athlete India tsür Anju Bobby George nem 'Woman of the Year Award' naroküm agütsü.

World Championship nung medal angur India athlete rongnung arishi kum 44 tain Anju asütsü. 2003 kum Iba World Championship long jump nung lai bronze medal ngua lir.

Bodhbar (01.12.2021) aonung World Athletics indang Award sentong agiba mapang Anju nem Iba Award (Woman of the Year Award) agütsü.

"Taoba mapang international long jump star, Anju-i tanü tashi saispung wadang nung kanga meranga inyakdar. 2016 kum tetsürtem

atema lai training academy ka lapok aser iba academy nungi World U20 medal angurtem adokogo," ta sangdong ka nung World Athletics-i ashi.

"Indian Athletics Federation indang Senior Vice President ka ama 'gender equality' atema tasüita jembir, Bobby George-isa iba saispung telungtet nung tarutsü mapang lennir tajung adokdaksütsü asoshi lai school azünger tetsürtem shisatsü agi nungitta yarir," ta kasa sangdong nung shia lir.

Taoba mapang track & field athletes, Anju-i, "World Athletics ajanga kü nem iba naroküm agütsüba asoshi pelar aser iba Award khonang ama agizüker," ta ashi.

"Saispong atema tajung ka inyaksü jangratemer aser tetsürtem nem sabang ka agütsütsü asoshi inyakdang kü mulung anisungzüker. Kü maparen jangjatetba atema kanga dang pelar," ta Twitter nung Anju-i lemsatop.

"Indian Athletic Federation

(AFI) nung ni senior vice-president ka ama inyaker aser kü academy - Anju Bobby George Foundation nung tanur densema tetsür athlete 13 nem tesayuba agütsüdar aser kum asem tsungda parnoki alima sabang nung shilem agi tenzüksü. Kü wadang takok angutsüsa nungitta yariba atema fans, külem athlete, coach, kibong zungsemtem, federation aser lenmang balala ajanga yarir ajak dang pelaba metetdaksür," ta Anju Bobby-i lemsatop.

Anju ya Kerala nungi lir aser IAAF World Championships (Paris, 2003) nung bronze medal den IAAF World Athletics Finals (Monaco, 2005) nung gold medal angur India nung athlete rongnung Anju asütsü.

2004 kum Athens Olympic Games - long jump nung Anju-i metre 6.83 shi tongteta jenjang trokbuba ajangzüktet, saka doping ken o nung America tsür Marion Jones agienba sülen 2007 kum Anju ya jenjang pungobubai ajungketa liasü.

Anju nem iba naroküm agütsüba asoshi Athletics Federation of India (AFI)-i World Athletics dang pelaba metetdaksü.

Maneni, kasa sentong nung, Olympic champion Jamaica tsür Elaine Thompson-Herah aser Norway nung Karsten Warholm naprongla nem 'World Athletes of the Year' agütsüogo.

## BWF World Tour Finals: Sindhu semifinal-i iogo

**Bali, Luchii/December 02, 2021 (Agencies):**

Brehostibarnü, BWF World Tour Finals asayamung nung world champion PV Sindhu-i takok anguba sülen la semifinal tongogo. Group A tanabuba match nung Sindhu-i Germany tsür Yvonne Li tsükdaksü.

2018 kum Sindhu-i iba asayamung takok ngua lir aser 2017 kum lai iba asayamung final tongtetta asayaogo.

Taküm, iba asayamung semi final tongtetsü atema Sindhu-i 21-10 21-13 agi world no 23 Li tsükdaksü. Iba asaya minute 31 nung tembang.

Group A asaya tatembuba nung Sindhu-i Thailand tsür top seed Pornpawee Chochuwong den asayatsü.

World no. 14 Kidambi Srikanth, shibai 2014 kum kasa asayamung knockout stage tongteta asaya, pa iba asayamung nungi tukuogo. Group B nung Srikanth-i 18-21 7-21 agi asemen Junior World Champion Thailand

nunger Kunlavut Vitidsarn makok.

Tetsür tarep asaya nung, India tsür Ashwini Ponnappa aser N Sikki Reddy nati tanabenbuba atonga tamakok nguogo. Tenati 19-21 20-22 agi Bulgaria tsür Gabriela Stoeva aser Stefani Stoeva na makok.

Group B match tatembuba nung Ashwini aser Reddy nati England tsür Chloe Birch aser Lauren Smith den asayatsü.

Kasa asayamung tebur tarep tetoktepa nung walkover' ajanga Indonesia nung Marcus Fernaldi Gideon aser Kevin Sanjaya Sukamuljo nati India nunger Satwiksairaj Rankireddy aser Chirag Shetty madak takok angu. Satwik temekok nung timtem adokba sülen, tenati asaya nung shilem magitetsüsa kumadok. Iba asayamung tanungba asaya nung Satwik aser Shetty nati shilem magitsü.

## Yanlung Unity-i Night Volleyball tournament kokogo



Mon, Luchii/December 02, 2021: Yanlung Unity aser Empire Spikers Black asayartemi sempet agizükba sülen tangokba noksa yangi angur.

**Mon, Luchii/December 02, 2021 (TYO):** Lapa Lampong, Tizit Mon nung November 25 nungi 29, 2021 tashi "One life, one chance, avoid drugs" omen nung ajemdaker 2buba Night Volleyball tournament ayongzüka liasü, ta sangdong ka ajanga metetdaksü.

Iba asayamung Organising Committee-i, Assam nungi team ana aser Arunachal nungi team ka densema Night Volleyball tournament nung team 16 agi shilem agiogo, ta metetdaksü.

Iba championship title takok angutsü atema, Asaam nungi Yanlung Unity-i Empire Spikers Black tsükdaksü. Empire Spikers ya külem State-Assam nungi lir.

Takok angur team - Yanlung

Unity-i senpet 30,000 den citations agizük. Kasa mapang, runners up Spikers Black nem senpet 20000 agütsüogo.

Individual Award atema, Empire Spikers Black nungi Akash Deori-i 'Best Setter' aser Yanlung Unity nungi Prabitra Deori-i 'Best Spiker' award angu.

Anogo pungo tashi ayongba Volleyball asayamung ya temesepba mozü amshiba nokdangtsü mapatong ajungketsütsü nukjidong nung Naoshelim ajanga achayanga liasü.

Maneni, iba asayamung mapang senotsü tenla arubatem (donation box) Rehabilitation centre nung agütsüogo, ta kasa sangdong nung shia lir.

## BILEMDANGANG

"Tenükmeremer agi sünger aliba yimti nung kodanga tanishir tajung mangutsü."